

## La Lettre Jèrriaise pour lé 5 du mais d'Avri 2025

Bouônjour bouonnes gens, ch'est Françouais L'Maistre tch'a l'pliaîsi dé vouos présenter La Lettre Jèrriaise, aniet, Sanm'di lé 5 du mais d'Avri 2025. La s'maine pâssée, Aline vos d'mandit tch'est qui 'tait vouot' chouaix pour l'Antienne Nâtionale dé Jèrri ? Eh bein, lé mein a tréjous 'tait « Man bieu p'tit Jèrri » et j'sis bein content qué ch'est chutte chanson-là tch'a 'tait chouaîsie ! Nous s'en va continnuer à ouïe « Man bieu p'tit Jèrri » pour bein d's années lé jour dé la Libéthâtion au Sèvice dans La Pliaiche dé La Libéthâtion lé 9 du mais d'Mai.

J'sis bein fyi qué ch'est man P'pée tchi l'avait traduit en Jèrriais dé l'Angliais auprès la dgèrre. Lé Sieur Edward O'Henry soulait jouer la musique sus l'Orgue dans l'entré-deux des filmes au Forum (Lé vièr cinnéma).

Mais en pâlant dé la Libéthâtion, i' y' en a combein d'nous dé restant tchi 'taient ichîn duthant la dgèrre et tchi fûtent libéthés ? Quand nous pense, j'sommes à célébrer 80 ans dé libèrté lé préchain mais !!

Pour mé, la mémouaithe êtèrnelle dé ches jours-là est d'aller en Ville aue man P'pée et ma M'mée et man fréthe, 'Douard, pour vaie les célébrâtions

des Jèrriais tchi 'taient libéthés. J'm'en rappelle bein qué j'feûnmes à West Park dans la route souos lé Pavillon et les « Tommies » 'taient à env'yer des chucrîns et des patchets dé « chewing gum » dans la foule du balcon du Pavillon. J'n'avions autcheune idée tch'est qué ch'tait, du chewing gum, et man P'pée nous explyitchit tch'est qu'nous faithait pour pouver avoir l'goût !

Mais, ch'tait excitant pour nous dé vaie tout chu monde à célébrer, spécialement quand nous n'avait pon veu grand monde par les c'mîns duthant toute la dgèrre. Ch'tait eune révélation !! Ch'tait lé jour après la Libéthâtion, pa'ce qué lé jour dé d'avant, man P'pée 'tait embarrassé à plianter des caboches, des bruxelles et des tonmates dans l'gardîn duthant la matînnée et pis il' avait invité d's anmîns pour v'nîn dîner avec nous. Mais, i' y' avait d'l'excitement dans l'vaîsînné étout, car les vaîsîns et d's anmîns lus 'taient réunis dans l'Assemblée à Portînfé, et i' y' avait un tas d'rêvillon !! Lé 9 'tait un Mècredi, et i' pathait qué les célébrâtions et l'rêvillon continnaient pour tchiques jours jusqu'à la fin d'la s'maine ! N'en v'là assez pour aniet mais faites bouôn souain dé célébrer bein. Ayiz tous eune bouonne sémaine.

À bi.

